


**TEZAU LITURGIC**  
**15 DECEMBRIE**

**SLUJBA**  
**SOBORULUI**  
**SF.NOI MUCENICI**  
**ȘI MĂRTURISITORI**  
**AI**  
**TAVRICESKULUI**



**MOSCOVA, 2000**



# СЛУЖБА НОВОМУЧЕНИКАМ ТАВРИЧЕСКИМ

## На малой вечерне

На «Господи воззвах», глас 1:

Днесь, вернии, ликовствуем, во псалмех и песнех Господеви поюще и чтуще память страстотерпцев земли крымския, поправших буесловия безбожная и истинную веру утвердивших, и воззовем к ним: молити Христа Бога, спастися душам нашим.

Жития невещественнаго восхотевше, мученицы, гонителей не убоялися есте, и веру пред ними исповедавше, гонения и муки претерпели есте. И ныне, со ангелы ликовствующе, предстоите Престолу Христа Бога нашего.

Пищи райския насладитися возжелевше, угодницы Господни, голодом и жаждою, мучими были есте, и славою от Бога, венчани быти восхотевше, земную славу отвергли есте. От Него же и прославились есте на земли пред человеки.

В небесныя обители вселившеся и со ангелы предстояще Престолу Христову, яко истиннии исповедницы и страстотерпцы, молитве прегрешений нам оставление даровати, и мир и велию милость.

СЛАВА, глас 6:

Яко жертвы непорочныя на Божии трапезе положилися есте, мучений бо ваших ради благослови вас Господь, и зряще благая горняго Сиона, наслаждаетея Божественнаго радования.

И НЫНЕ:

Слава на небесех и на земли веселие, се бо Царица со святыми страстотерпцы, за вся ны в церкви молится Богу

На стиховне стихиры, глас 8:

Стих: Дивен Бог во святых Своих, Бог Израилев.

Нов сад священномученик Таврических, песньми восхвалим, яко зарями вся просвещающия, иже в нощи неведения пребывающим, к Свету богоразумия путь осиявающия.

Стих: В церквах благословите Бога Господа от источник Израилевых.

Дом Духа Святаго были есте, / благодатию исполнени божественных учений: / ими же напояете мир, страсотерпцы премудрии.

СЛАВА И НЫНЕ, глас 3:

Радуйся, Марие Богородице, храме нерушимый, паче же и святой, о немже вопиет пророк: свят храм Твой, дивен в правде.

Тропарь, глас 8 или 1:

Избраннии православия ревнителие / , пастырей Христовых похвало / , страдания и узы за Церковь Святую претерпели есте / , светильницы веры православныя показалися есте, / от властей беззаконных убиении быша / , молитвами вашими спасайте души наша.

## **НА ВЕЛИЦЕЙ ВЕЧЕРНИ**

На «Господи воззвах», глас 2:

Днесь светло красуется земля Таврическая, торжествующи честную память новомученик своих, тии бо светильницы веры православныя

показавшеся, неистовство безбожных славно препобедили, тем же вопием к вам: молитте Христа Бога о спасении душ наших.

Добродетелей верх и верных основание, святителей слава и мучеников похвало досточудне Порфирие; вся верныя призываеши светло праздновати святую память твою.

В вере Христове, Димитрие, Божественною славою облеклся еси и града Ялты благоукрашение явился еси. Церкви святителя Христова Иоанна Златоуста настоятелю, и страстотерпче всечестне, и мучениче верне.

Церкви Христовой верен быв, отче наш Николае, не дал еси осквернити сосудов церковных соборныя церкви богохульником, и ныне в сонме мученик явленный, молися о почитающих тя.

Священную одежду омочив в крови твоей, преподобномучениче Варфоломее, сугуб венец от Христа приял еси всеблаженне, пострадав во граде древнем Феодосии, мученик Господень явился еси.

Бусловие обновления лжеумнаго низлагая, священным словом твоим утвердил еси маловерных сердца, и к жизни вечней путеводил

еси, мучениче Владимире, моли спастися нам, словесы и дела тебе последовати произволяющим.

Священне отче Тимофее, града Алушты украшение, ты бо наветы претерпев неправедныя Христа прославил еси пред мучители, моли спастися нам в буре житейстей потопляемым.

Отче Иоанне всечестне, града Судака верное ограждение, проповедуя слово истины, добрый конец жития яко мученик приял еси. И ныне молися, да вечнаго живота причастницы будем с пострадавшими Христа ради.

Отче Антоние преподобне, на Горе Афонстей противу невидимых враг добре подвизался еси, послежде же врагом невидимым во всеоружии кротости противустал еси, в земли Тавричестей веру правую защищая, и яко кадило благовонное исповедание и мучение твое Господеви принося, Егоже моли даровати душам нашим мир и велию милость.

СЛАВА, глас 4:

Богомудрый Порфирий со Николаем,  
Димитрием, Варфоломеем, Владимиром,  
Иоанном и Антонием добльствоваша за веру,

враги победивше, и яве возсияша яко звезды пресветлы, уяснише верных сердца, безбожия и раскола тьму отгнавше светозарением Духа.

**И НЫНЕ**, Богородичен воскресный по гласу «Славы»: (из 1-го Приложения Минеи).

Паремии мученикам общие:

1-я: Тако глаголет Господь: вси языцы:

2-я: Праведных души в руце Божией:

3-я: Праведницы во веки живут:

На литии стихира храма и святым настоящия, глас 3:

Днесь ликовствует радостно Крымская земля, и хвалится богоугодными деянии исповедник и мученик своих, к нимже яко добрым защитником и поборником ныне вопием: молитесь блажени да сподобит и нас Царствия Небеснаго Христос Бог наш.

Столпи Православия непоколебимии, меди крепчайшии и железа твердейшии, новомученицы Крымстии непобедимии, молитесь ныне Подвигоположника вашего крепость духовную малому стаду даровати, во еже твердо стояти за догматы Церкви Вселенския.

СЛАВА, глас 3:

Приидите празднлюбцы, Христовых страдалец в песнях почтим: священномученика Порфирия непобедимаго, Димитрия и Николая, Владимира и Варфоломея, Тимофея и Антония со Иоанном, Николая, Андрея и Елеазара со Димитрием и Стефаном, доблестных новомученик лик, добре подвизавшихся и венцы победными увенчании, молятся Христу за всю землю Крымскую и о иже верою и любовию совершающих память их.

И НЫНЕ, глас 4:

О Пресвятая Дева, Заступнице усердная рода христианского, правды вышняя чающе, к Тебе прибегаем, стена нам буди и помощь непобедимая противу нашествия лжеучителей ересей и расколов. Умоли убо Сына Твоего и Бога нашего да сохранит Отечество наше в правоверии и единомыслии.

На стиховне стихиры, глас 2:

Яко звезды многосветлыя в земли Крымстей возсиявше, осветили есте сердца верных в прославлении вашем, страсотерпцы святии. Ныне же предстояще Престолу Царя Славы, молитесь всякое шатание душевредное от земли наша истребити.

Стих: Тебе ради умервщляеми есмы весь день, вменихомся, яко овцы заколения (Пс. 43, 23).

Властители богомерзкия тщашася ласканьми запяти вас и отвратити от спасительная ваша веры, вы же суще на земли, яко ангели неуклонни пребыли есте. И ныне на небесех с лики мученик веселящеся, просите нам оставление грехов и велию милость.

Стих: (Вменихомся яко овцы заколения). Бог нам прибежище и сила, Помощник в скорбех обретших ны зело (Пс.45, 2).

Камение твердо явистесья, святии, противу прещений безбожных мучителей, сего ради хвалится вами земля Российская и верно вопиет: слава Прославляющему святыя Своя.

СЛАВА, глас 8:

Приидите верных собори, в память святых Крымския земли, песни победныя принесем и тако возопиим: умилостивите о нас Христа, Страстоположника вашего, да возможем достойно подвиги ваша похвалити.

**И НЫНЕ**, глас 8:

Огnezрачный жезл силы Твоея, яко пламень чист, и сим ведеши, Путеводительнице, люди Твоя, да соблюдаются от бед христианы.

На благословение хлебов

Ин тропарь святым (дважды), глас 4:

Днесь притецем, вернии, к лику новомученик Крымских, яко добрым делателем сада Иисусова, во дни гонений и озлоблений веру непоколебиму соблюдшим, и со умилением воззовем к ним: молитесь отечеству вашему в православии и единомыслии сохранитися и сыновом Российским в мире спастися.

И Богородице Дево (единожды).

## **НА УТРЕНИ**

На Бог Господь: Тропарь святым (дважды),

**СЛАВА И НЫНЕ**, Богородичен: Еже от века утаенное.

По 1-ой кафизме седален святым, глас 1:

Благочестно пожил еси во святителех, смиренно крест свой взем, Христу последовал еси, гонение

и мучения претерпевая, священномучениче Порфирие, и ныне со святыми Крымския земли и мученик лики предстоя, моли спастися нам.

**СЛАВА:**

Божественною свыше просветившеся благодатию, святителю Порфирие с богомудрыми сподвижники и многими муками жертву благоприятну Богу принесосте, и ныне молитве даровати согрешений очищение, верую творящим память вашу.

**И НЫНЕ:**

Едина крепкая и теплая Предстательнице роду человеческому, Богородице Дево, непрестанно моли со святыми священномученики, Его же родила еси паче естества Бога Слова, спасти всяческая.

**По 2-ой кафизме:**

Терпением и мужеством вашим всю страсть подъясте мученицы Крымския, любовь взирая на Милостиваго и Человеколюбиваго Бога, подающего миру велию милость.

**СЛАВА:**

Земля освятися кровию всечестною Вашею, святии мученицы Крымския, и вся люди православныя обогатишася Вами, Богомудрии угодницы Христовы, молитесь Господеви, спасти верою поющия Вас.

И НЫНЕ, глас 6:

Настави ны на путь покаяния, уклоняющияся безпрестанно в безпутия злыя и Преплагаго прогневающия Господа, Неискусобрачная Благословенная Марие, прибежище отчаянных человек, Божие обиталище.

Полиелей Величание:

Величаем Вас, священномученицы Крымския, и чтим честная страдания Ваша, яже за Христа претерпели есте.

Псалом избранный

Услышите сия вси языцы (общии святительские).

По полиелеи седален, глас 2:

Званию Господа своего последовавше, крест аки знамение воскресения, в руци восприемше, не убоялися есте мучений за веру православную, но упованием приидосте к безбедному пристанищу, и страданий своих обретше воздаяние,

веселитесь во Свете неприступнем. Темже Вас почитаем, страстотерпцы всеблаженнии.

СЛАВА, глас 6:

Память твою святителю Порфирие празднующе со страстотерпцами Николаем, Димитрием, Варфоломеем, Владимиром, Тимофеем, Иоанном, Антонием, Николаем, Андреем, Елеазаром со Димитрием, Стефаном вопием вам: со Ангелы предстояще в дерзновении мнозе, о всех нас, молитесь ко Владыце Христу.

И НЫНЕ:

Всепетая Богородице Дева, всех скорбящих присная Радосте, на образ Твой умильно взирающе, вкупе со священномученики крымскими вопием Ти: спасай нас, Ты бо еси Едина Заступница наша усердная, разве Тебе иныя не вемы.

Степенна, 1-й антифон, глас 4.

Прокимен: (см. общ. Минею, службу сщмчч.)

Евангелие: Лк., 24 зач.

По 50-м псалме стихира, глас 6:

Веселися, Крымская земле, и вся грады и веси, горы и холми воспещите руками, се бо ныне

прославляется лик священномученический, мы же бранными усты вопием: избавите землю нашу от нашествия агарянского и даруйте мир душам нашим.

## Каноны

Канона два, первый молебный ко Пресвятей Богородице изрядный, творение благочестивейшего царя господина Феодора Дуки Ласкаря, глас 8

## ПЕСНЬ 1

ИРМОС: Колесницегонителя фараона погрузи, чудотворяй иногда Моисейский жезл, крестообразно поразив и разделив море, Израиля же беглеца пешеходца спасе, песнь Богови воспевающа.

Скорбных наведения обуревают смиренную мою душу, и напастей облацы мое покрывают сердце, Богоневестная: но Свет рождающая Божественный и Превечный, возсияй мне свет радостный.

От безмерных нужд и скорбей, и от врагов лютых, и напастей житейских, избавься Всечистая, крепкою силою Твоею, воспеваю, величаю безмерную Твою милость и еже ко мне Твое утешение.

СЛАВА:

Ныне надеяся, к Твоему прибегох заступлению крепкому, и к Твоему покрову вседушно притекох, и колени преклоняю Владычице, и плачу и стению, не презри мене окаяннаго, христианом прибежище.

И НЫНЕ:

Не умолчу вопити яснейше величия Твоя: аще бо не Ты, Отроковице, всегда предстояла еси, о мне молящи Сына Твоего, кто бы от толика бури и лютых бед избавил мя.

Канон священномученикам на 8, ирмос тойже.

Новый светильниче, возсиявый в земле Крымстей во дни гонений в тягчайшем часе для Церкви Православныя, священномучениче Порфирие, молися за отечество наше и вся люди во обстоянии сущия.

Отец духовный быв людем Крымския земли во дни шатания и нестроения, во едином стаде люди расточенная собирая и омофором святительским покрывая, молися о чтущих тя, блаженне.

СЛАВА:

Вседержителю духом предстоя, Порфирие блаженне, ежечасно наставляя еси люди во страхе Божиим, лживыя наветы и клеветы претерпевая, непоколебим пребыл еси.

И НЫНЕ:

Из глубины зол моих вопию Ти: Виждь, Владычице Дево, скорбь мою, и не отвержи мене во обстоянии сущаго. Услыши убо вопль сердца моего, и покрой мя ризою Твоею, да воспою Ти песнь победную.

Катавасия: Отверзу уста моя.

ПЕСНЬ 3

ИРМОС: Небеснаго круга верхотворче Господи, и Церкви Зиждителю, Ты мене утверди в любви Твоей, желаний краю, верных утверждение, едине Человеколюбче.

Недоумевый от всех, болезненно зову Ти: предвари теплое предстательство, и Твою помощь даждь ми рабу Твоему смиренному и окаянному, Твоего заступления ищущему тепле.

Удивила еси воистину ныне на мне Владычице, благодеяния Твоя Отроковице, и милости Твоя. Темже славлю Тя, и воспеваю, и почитаю многое и безмерное смотрение Твое.

СЛАВА:

Буря мя обуревают напастей, Владычице, и скорбных треволнения погружают: но предваривши руку ми даждь помощи, теплое заступление и предстательство Твое.

И НЫНЕ:

Истинную Богородицу исповедую Владычицу Тя, смерти державу потребившую: яко бо оживляющая, от уз адовых к животу возвела еси мя в землю текшаго.

Ин. ирмос тойже.

Мучения и гонения претерпевая, священномучениче Димитрие, из града Ялты в Казахстан изгнан бысть, обаче и по возвращении верен пребываеши, в руци Божии спасение пасомых вверяя.

Святой священномучениче Николае, святителю Порфирию сподвижнике добрый на ниве Христовой, тому и соузник и сострадалец явился еси.

СЛАВА:

Человече Божий, Димитрие славне, в заточении сущим священником и чадом их сирым любовию

послужив, не остави и нас, обнищавших в узах греховных.

**И НЫНЕ:**

Егда предстанеши, Владычице, в помощь нашу, никтоже сокрушит ны, яко велие дерзновение обрела еси у Христа Бога, Сына Твоего, и сие ведуще вопием Ти: спаси ны под покровом Твоим.

Седален, глас 4:

Со святителем Порфирием Димитрия мудраго, Николая с Варфоломеем и Владимиром верою почтим и досточудных Тимофея, Иоанна, Антония, Николая, Андрея и Елеазара с мученики Димитрием и Стефаном служители бо, сии Бога Вседержителя бывше, верою тому благоугодиша: и мучения от безбожных прияша: молитесь убо раздирания церквей искоренити и ересей востания скоро разорити, веру же добре сохранить.

**СЛАВА:**

Пострадавшие от незаконных, мученицы всехвальнии венчаются претерпевшие бо горькия клеветы, заушения и биения, и раны, на небесех наслаждаться нетленныя жизни сподобистесь.

И НЫНЕ,

Богородичен: Разумейте непокорнии еретицы: не подобает вкупе с вами и вам подобящимся, нам молитвы совершати и о единении совещеватися лжецерковном. Святии бо Апостоли глаголют: Аще кто со отступники помолится, аще бы и в дому то было: таковый да будет отлучен. Не сотворим же братие сего и ко Владычице воззовем: Защити нас под державою Твоею Всепречистая.

ПЕСНЬ 4

ИРМОС: Ты моя крепость, Господи, Ты моя и сила, Ты мой Бог, Ты мое радование, не оставль недра Отча, и нашу нищету посетив. Тем с пророком Аввакумом зову Ти: силе Твоей слава, Человеколюбче.

И где прочее иное обрящу заступление; камо прибегну; где же и спасуся; кую теплую возимаю помощницу, скорбьми житейскими и бурями, увы, мне колеблему; на Тя Едину уповаю, и дерзаю, и хвалюся, и притекаю к покрову Твоему, спаси мя.

Реку сладкую милости Твоя, богатыми дарми оросившую, всеокаянную и смиренную душу мою, Всечистая, напастей и скорбей пещию

сожженную, величаю, проповедую и притекаю к покрову Твоему, спаси мя.

СЛАВА:

Тя Чистую, Тя Деву и Нескверную, Едину имам стену неборимую, прибежище, покров крепкий, оружие спасения, не презри мене блуднаго, надеждо ненадеемых, немощствующих помощи, оскорбляемых радости и заступление.

И НЫНЕ:

Како изрещи Твоя по достоинству возмогу безмерныя щедроты, о Владычице, яже мою всегда душу люте оскорбляемую, яко воды обышедшия; но о Твоего промысла и благодеяния, егоже безумно окаянный погубих!

Ин.

Николае чудный, исповедниче непоколебимый, многия изгнания претерпел еси, пастырю наш добрый, града Симферополя украшение и твердый поборниче веры православныя.

Истину вещав, в заключении пребывая многожды, и молитвы творя со святители Никодимом и Порфирием и многими иереи соборная церкве взывал еси: Слава Богу тако устроившему.

СЛАВА:

Кроток и смирен быв иерею Божий Елеазаре, кротко отвечал еси вопрошающим и клеветующим на тя. Сего ради гонения и заточения подъял еси со святителем Порфирием богомудрым.

И НЫНЕ:

Отроковице Всечистая, Мати Бога Вышняго, молися и ныне за вся во обстоянии и скорбех сущия отцы и братию нашу, и вся христианы предстательством Твоим защити.

ПЕСНЬ 5

ИРМОС: Вскую мя отринул еси от Лица Твоего Свете незаходимый, и покрыла мя есть чуждая тьма окаяннаго: но обрати мя, и к свету заповедей Твоих пути моя направи, молюся.

Благодарно вопию Ти: Радуйся, Мати Дево; Радуйся Богоневесто, Радуйся, божественный покрове. Радуйся, оружие и стено нерушимая. Радуйся, предстательство и помощь и спасение, иже к Тебе притекающим верою.

СЛАВА:

Ненавидящие мя всеу стрелы и мечи и ров  
уготовиша, и ищут всеокаяннаго моего тела  
исторгнути, и низвести в землю желают: но от  
сих Чистая предваривши, спаси мя.

**И НЫНЕ:**

Кий Тебе дар принесу благодарения, за яже  
насладихся Твоих дарований, и Твоея  
безмерныя благостыни; темже убо славлю,  
песнословлю, и величаю Твою неизреченную ко  
мне милость.

**Ин.**

Мученик добр был еси, Владимире, глаголя без  
преткновения пред гонители в защиту веры  
православныя.

О гонящих тя, блаженне Владимире, во дни и в  
нощи молитвы Богу творя, веру непорочно  
соблюл еси, лжеучителей раскола и обновления  
богомерзкаго обличая.

**СЛАВА:**

В молитве и богомыслии непрестанном пребыл  
еси, отче, благоговейно, прение со безбожными  
иереи творя, и главы тех заушая словесно.

**И НЫНЕ:**

Светоподателю ныне предстоя и с мученики  
ликовствуя, помолися, святче Божий Димитрие,  
ко Пресвятей Богородице о воспевающих  
подвиги твоя.

## ПЕСНЬ 6

ИРМОС: Молитву пролию ко Господу, и Тому  
возвещу печали моя, яко зол душа моя  
исполнися, и живот мой аду приближися, и  
молюся яко Иона: от тли, Боже, возведи мя.

Облацы скорбных покрыша окаянную мою душу  
и сердце, и помрачение вводят мне,  
Отроковице: но рождшая Свет неприступный,  
изжени сия далече, дохновением божественных  
молитвы Твоя.

Утешение в скорбех вем, и недугов врача Тя  
знаю, и всесовершенное сокрушение смерти, и  
реку живота неизчерпаемую, и всех сущих в  
напастех скорое и быстрое заступление.

## СЛАВА:

Не скрываю глубины Твоя милости, и ток  
безмерных чудес, и источник приснотекущий  
воистинну, яже ко мне милости Твоя  
Владычице: но всем исповедую, и вопию, и  
проповедую, и вещаю.

И НЫНЕ:

Обыдоша мя житейския бури, яко пчелы сот,  
Дево, и мое содержащя сердце, уязвляют  
стрелы скорбей: но да обрящу Тя помощницу, и  
гонительницу, и избавительницу, Всепречистая.

Ин.

Таков подобаше проповедник быти, отче  
Варфоломее преподобне, крест железный на ся  
возложив, иже есть терпение и упование на Бога  
Живаго.

Отложив привременная, всечестный мучениче  
Димитрие, прещения, истязания, уничижения  
судей незаконных презрел еси, Христа Единого  
возжадав, с Нимже и ликовствуеши в  
бесконечныя веки.

СЛАВА:

Неправедно от безбожных ят быв,  
священномучениче Андрее, наветы лживыя  
отвергъ еси, глаголемыя яко противу властей  
предержащих поучал еси люди, обаче и смерти  
осужден быв, воспевал еси Единому  
Безгрешному и Всеправедному Судии всех Богу:  
Аллилуя.

И НЫНЕ:

Слава на небесех и на земли веселие, се бо Царица со святыми страстотерпцы Крымскими за вся ны в церкви молится Богу.

Кондак, глас 4:

Избранныя новомученицы, о нихже ликовствуют вернии, прославляя звезды незаходимыя неба православнаго, Церкви Христовы исповедницы, венцем мученическим увенчаныя. Святый священномучениче Порфирие со сподвижники твоими, предстоя у Престола Царя Славы, молити Христа Бога, Отечеству нашему в православии утвердиться и ниспослати нам велию милость, вопиющим вам: Радуйтесь, светильницы земли Таврическойя.

Икос

Воспоим ныне светильницы Таврическойя земли, возсиявшии на небе Православнем, и воззовем:

Радуйтесь, святии земли нашея, во благочестии Христу подражавшии; Радуйтесь, искушения врага добре претерпевшии в гонении.

Радуйтесь, бедствующим многомощныя помощницы.

Радуйтесь, во православии стоящих незыблемое утверждение. Радуйтесь, подвиг свой кровию запечатлевшии.

Радуйтесь, от Небеснаго Пастыреначальника венцы мученическия прияли есте.

Радуйтесь, добропобеднии воины Царя Небеснаго. Радуйтесь, светильницы земли Таврическия.

## ПЕСНЬ 7

ИРМОС: Отроцы еврейстии в пещи попраша пламень дерзновенно, и на росу огонь преложиша, вопиюще: благословен еси Господи Боже во веки.

Свет рождшая Богородице, помрачена мя нощию грехов просвети Ты, Света сущи приятелище чистое и непорочное: да любовию Тя славлю.

Покров буди и предстательство, и заступление, и похвала, Дево, обнажену мне ныне всякия помощи, беспомощных сило, и надеждо ненадеемых.

СЛАВА:

Всею душею и мыслию, и сердцем, и устнами Тя славлю, насладився Твоих великих дарований: но, о Твоея благостыни, и безмерных Твоих чудес!

**И НЫНЕ:**

Виждь милостивым оком Твоим, и посети озлобление еже имам, и лютых напастей, и вреда, и бед, и от искушений мя избави безмерною милостию Твоею.

**Ин.**

Причастник быв Божественныя славы, отче Тимофее, не убоявся гонений и мучений от власти антихристовой. Темже молим тя, даруй нам веру дерзновенную.

Единому Богу служа, отче Елеазаре, поучал еси чада духовныя бояться Суда Божия паче суда человек грешных.

**СЛАВА:**

Смерть приемше Тимофее и Гаврииле ныне ликуете на небесех в сонме святых предстояще. Молитесь убо за землю Крымскую в нейже подвизались есте.

**И НЫНЕ:**

О Царице Всепетая, православных Похвало,  
буди стране нашей держава и заступление от  
находящих на ны ересей и расколов, и всяких  
богохульных учений насадителей, низводящих в  
бездну адскую многия души искупленных  
Кровию Сына Твоего

## ПЕСНЬ 8

ИРМОС: На горе Святей прославльшася, и в  
купине огнем Приснодевы Моисеовы тайну  
явльшаго, Господа пойте, и превозносите во вся  
веки.

Благоутробия ради милости Твоея, Дево, не  
презри Чистая, потопляемаго мене бурею  
жителейских волн: но даждь ми руку помощи,  
утесняемому озлобленьми жителейскими.

Обстояния и скорби и нужды обретоша мя,  
Чистая, и напасти жителейския, и искушения  
отвсюду мя обыдоша: но предстани ми, и  
заступи мя крепким Твоим покровом.

## СЛАВА:

В бурях да обрящу Тя пристанище, в печалех  
радость и веселие, и в недужех скорую помощь, и  
в бедах Избавительницу и Предстательницу во  
искушениях.

И НЫНЕ:

Радуйся, Престоле огнеобразный Господень.  
Радуйся, божественная и манноприемная ручко.  
Радуйся, златый светильниче, свеще неугасимая.  
Радуйся, девам славо и матерем украшение и похвало

Ин.

Избави стадо Твое от належация ныне бури нестроений и бед, отче Иоанне блаженне, приводя ны в пристанище тихое послушания воле Христовой, да возможем с тобою взывати: Господа пойте и превозносите во вся веки.

Подобен быв Златоустому, Истины слово вещая, на ниве Христове труждаяся, спящия пробуждая, утешая озлобленныя, ихже и научил еси пети: Господа пойте и превозносите во вся веки.

СЛАВА:

Во узах горьких пребывая, мучениче Димитрие, веру тверду, и надежду светлу, и любовь нелицемерну явил еси, присно глаголя: Господа пойте и превозносите во вся веки.

И НЫНЕ:

Едино Предстательство имамы, да не постыдимся, вопия к Тебе Пречистой избави от бед рабы Твоя. Стефан же узрев милости Твоя в песнях воспел еси: Благословен Бог отец наших.

Хвалим Благословим: Катавасия.

## ПЕСНЬ 9

ИРМОС: Ужасеся о сем небо, и земли удивишася концы, яко Бог явился человеком плотски, и чрево Твое бысть пространнейшее небес. Тем Тя Богородицу ангелов и человек чиновначалия величают.

К кому прибегну иному, Чистая; где притеку прочее и спасуся; камо иду; кое же обрящу прибежище; кое теплое заступление; кую в скорбех помощницу; на Тя Едину уповаю, и о Тебе Единой хвалюся, и на Тя дерзая, прибегах.

Несть исчислити возможно величия Твоя Богоневесто, и глубину неиспытательну изрещи, паче ума чудес Твоих, совершенных выну, любовь Тя чтущим, и верою поклоняющимся, яко воистину Бога рождшей.

СЛАВА:

В песнях благодарных славословлю, и почитаю безмерную милость, и многую силу Твою всем

исповедую, и благодеяния Твоя, яже истощила еси на мя, проповедую, величаю душею же и сердцем, и мыслию, и языком всегда.

**И НЫНЕ:**

Моление мое прими убогое, и плача моего не презри, и слез, и стенания: но заступи мя яко Благая, и прошения исполни: можеш бо вся, яко всемогущаго Владыки Бога Мати, аще возмагаеш токмо моему окаянному смирению.

**Ин.**

Добре подвизався на Святей горе Афонстей, отче Антоние, в послушании и молитве благодать Св. Духа стяжав, землю же Крымскую подвигом мученическим украсил еси.

Ревностию Божественною распалаем, Антоние досточудне, образ терпения и мужества явился еси. Темже и нам, немощным, последовати Христу произволение доброе даруй.

**СЛАВА:**

Прост, благолепен, безстрастен быв, человек Божий Антоние, просто отвещая о монашестве житии твоём, сети хитросплетенныя наветник твоих расторгая

незлобием, кончину мученическую, преподобне, приял еси.

**И НЫНЕ:**

Егда взираем на образ Твоего изображения, Чистая, именуемый Скорбящая, вопием во отчаянии сущии, огради нас под покровом Твоим и спаси вся ны.

**Светилен.**

Возсия нам заря невечерняго дне в памяти святых страстотерпец; тии бо тьму безбожнныя злобы, ересей и расколов отгнаша, и в залог чистоты православныя веры апостольския, кровь свою пролияша.

**СЛАВА:**

Терпя во страданиих, священномученицы Порфирие, Димитрие, Николае, Варфоломее, Владимире, Тимофее, Иоанне, Антоние, Николае, Стефане, Андрее, Елеазаре со Димитрием, телеса своя предали есте за Христа Бога. Темже мучеников святых равностоятелие, не оскудевайте молящися спастися душам нашим, от всякаго вреда чуждаго.

**И НЫНЕ:**

Избави ны, Пречистая, бесовския прелести, озлобления же и вреда, и искушения, да верою Тя славим, сущую по Бозе Заступницу и покров наш.

На хвалитех стихиры на 4, глас 4:

Дал еси, Христе Боже, Крымстей земли мученики преславныя Порфирия и Димитрия, Николая и Владимира премудрыя, Тимофея со Иоанном, Стефана, Антония, Николая, Андрея, Елеазара со Димитрием, крепкии камения веры, их же молитвами даруй земли нашей утверждение, и велию милость.

Святии страстотерпцы Твои, Христе, явистася Церкви непоколебимыя столпы, благочестия ревнители, нечестия и вражды прогонители, веры православныя утверждение и всякия ереси, раскола и богохульства от земли нашея искоренители.

Градом Крымским крепкии защитники, врагов преславнии победителие, христианом соратники непреоборимыи, мученицы Тавричестии показашася, иже ныне Престолу Твоему, Господи, во славе предстоят радующесея.

Дал еси дерзновение святым Твоим, Христе Боже, молитися о убивающих и гонящих я, ихже

молитвами расточенное стадо Твое воедино собери, отпадшия и ожесточенныя к покаянию привлещи, и ко святей Соборней и Апостольстей Церкви сопричти, ересей и расколов шатания разори, и людем Твоим даруй велию милость.

СЛАВА, глас 8:

Божественным огнем разжизаеми, и светом просвещаеми Пресвятыя Троицы отцы блаженнии, вражия победили есте советы и коварства, и на ревность божественную подвизая с собою верныя, мучения претерпели есте. Молитесь убо Единому Сердцеведцу Христу Богу, да помилует Отечество наше, архиереи и вся люди, и да подаст нам милость в день Судный.

И НЫНЕ:

Яко звезда светлая сияет днесь образ Твой, Владычице мира, пред нимже ныне молящися вопием Ти: обрати на путь покаяния заблудшия и спаси вся ны.

Славословие великое. Тропарь святым, Слава и ныне: Богородичен.

## НА ЛИТУРГИИ.

Блаженны от канона, песнь 3-я и 6-я на 8:Прокимен, глас 7: общий священномучеником.

Ин прокимен, глас 7: Тебе ради умервщляемся есьмы весь день.

Стих: Вменихомся яко овцы закления.

Апостол: Рим. 99 зач. 8: 28-39.

Аллилуиа, глас 4: Воззваша праведнии и Господь услыша их и от всех скорбей избави их.

Стих: Господь пасет мя и ничтоже мя лишит на месте злачне.

Евангелие: Лк. 52 зач.

Причастен: Тебе ради, Господи, умерщвляемся есьмы весь день.

